

Aningaasarsianit akileraarutit pillugit paasissutissanik nalunaaruteqartarneq pillugu Namminersorlutik Oqartussat nalunaarutaat

Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi, kingullermik Inatsisartut inatsisaatigut nr. 56, 25. november 2024-meersukkut allangortinneqartumi, § 33, imm. 1-4, § 33 a, imm. 1-4, § 33 d, § 35, imm. 1-2, § 56, imm. 1, aamma § 83, imm. 1-2 naapertorlugit aalajangersarneqarput:

Paasissutissanik nalunaaruteqartarneq

§ 1. Nalunaarummi matumani paasissutissat pineqartut akileraaruseriffimmut nalunaarutigineqassapput.

Imm. 2. Nalunaaruteqartussaataasut ukiumut aningaasarsiorfusumut paasissutissanik akileraartartunut 20-nut amerlanerusunulluunniit tunngasunik nalunaarutissallit tamakku digitalinngorlugit nalunaarutigissavaat.

Imm. 3. Nalunaaruteqartussaataasut ukiumut aningaasarsiorfusumut paasissutissanik akileraartartunut 20-nit ikinnerusunut tunngasunik nalunaarutissallit akileraaruseriffimmit peqqeqarsinnaapput tamakku digitalinngorlugit pigineqareerpata nalunaaruteqartussaataasorlu internettikkoorsinnaappat digitalinngorlugit nalunaaruteqassat.

Imm. 4. Akileraaruseriffik pitsaassutsinik, ilusissanik paasissutissallu inissitsiternerinut aamma akileraaruseriffiup paasissutissanik digitali atorlugu nalunaarutigineqartunut pingaaruteqartunik piumasqaatinik aalajangersaasinnaavoq.

Imm. 5. Nalunaaruteqartussaataasut digitali atorlugu nalunaaruteqartussaangitsut immersugassat akileraaruseriffimmit suliarineqarsimasut atorlugit paasissutissanik nalunaaruteqassapput. Paasissutissanut pineqartunut immersugassaliortoqarsimanngippat paasissutissat pappiliaq nalinginnaasoq atorlugu nalunaarutigineqassapput.

Ilinniagaqarnersiutit

§ 2. Namminersorlutik Oqartussat ukiut tamaasa ukiup siuliani ilinniagaqarnersiutit ani-ngaasanngorlugit tunniunneqarsimasut pillugit paasissutissat akileraaruseriffimmut piunnaqqeqaqqaatik nassiuttassavaat, tassunga ilanngullugu aningaasanik tiguisut kikkunerinik, inuup normuanik ilalerlugit paasissutissiisassapput.

Imm. 2. Paasissutissanik nalunaaruteqarnermi ilaatinneqartussap nalunaaruteqartussaataasumut kinaassutsini pillugu ilisimatitsissaaq, tassunga ilanngullugu inuttut normuni.

Imm. 3. Paasissutissat nalunaarutigineqartut pillugit Namminersorlutik Oqartussat ilinniagaqarnersiutininik pisartagaqartut ilisimatittassavaat.

Imm. 4. Nalunaaruteqarneq pillugu najoqqutassanik erseqqinnerusunik akileraaruseriffik aalajangersaasinnaavoq, tassunga ilanngullugu paasissutissiisussaataitaanermut piumasaqaatinik annikinnerulersitsisinnaanermut aamma ilinniagaqarnersiutininik pisartagaqartunut ilisimatitsisarneq pillugu.

Nalinik nalunaaruteqarneq

§ 3. Tamakkiisumik ilaannakortumilluunniit ajunngitsorsiat soorlu akeqanngitsumik nerisaqarneq illusimanerlu, inigisaqarneq, najugaqarallarneq, angalanerit, biilit oqarasuaatillu il.il. pillugit nalunaaruteqarnermi, akileraaruserinermik ingerlatsineq pillugu Inatsisartut inatsisaat naapertorlugu nalunaaruteqartussaataitaasup ajunngitsorsiap nalinga pillugu nalunaaruteqassaaq.

Imm. 2 Ajunngitsorsianut tunngatillugu ukiumut aningaasarsiorfusumut pineqartumut nalit inatsisitigut aalajangersakkat imaluunniit nalit Naalakkersuisunit aalajangersarneqarsimasut naapertorlugit naliliisoqassaaq.

Meeqqanut akilersuutit

§ 4. Meeqqanut akilersuutit il.il. kiisalu meeravissiartaarnermi tapiissutit tunniunneqartarneri pillugit Inatsisartut peqqussutaat malillugu Namminersorlutik Oqartussat kommunillu meeqqanut akilersuutininik akileeqqusissut, ukiut tamaasa piumaffigineqaqqaarnatik makku pillugit paasissutissanik akileraaruseriffimmut tunniussisassapput:

- 1) Akilersuisussaataitaasup inuttut normua najugaalu.
- 2) Akilersuutininik pissasaqartup inuttut normua najugaalu.
- 3) Ukiup siuliani akilersuisussaataitaasumiit akiliutigineqartut annertussusaat.

Imm. 2. Paasissutissanik tunniussisussaataitaaneq pillugu najoqqutassanik erseqqinnerusunik akileraaruseriffik aalajangersaasinnaavoq, tassunga ilanngullugu paasissutissiisussaataitaanermut piumasaqaatinik annikinnerulersitsisinnaalluni.

Pisortat tunitsivigineqartut attartortitsinerillu ilaannik isumaqatigiissuteqartut

§ 5. Namminersorlutik Oqartussat, Naalakkersuisut allaffeqarfii, Inatsisartut allaffeqarfiat, Kalaallit Nunaata Radioa, suliffeqarfiit namminersortitat il.il. aamma Kalaallit Nunaanni kommunit, aalisarnermiit, piniarnermiit, aallaaniarnermiit, savaateqarnermiit tuttuuteqarnermiillu, eqqumiitsuliornermiit sanalunnermiillu tunisassianik tunitsivigineqarnermut atatillugu aningaasarsiat B-nik akiliuteqartartut ukiut tamaasa piumaffigineqaqqaaratik makku pillugit paasissutissanik akileraaruseriffimmut tunniussisassapput:

- 1) Aningaasarsiat B-nik tiguisup inuttut normua imaluunniit CVR-normua.
- 2) Ukiup siuliani tunisinermut atatillugu aningaasarsiat B-t tiguisumut tunniunneqartut annertussusaat.

Imm. 2. Namminersorlutik Oqartussat kommunillu, inunnit angallammik, qimussimik alla-tigullu inunnt assartuummik attartortut ukiut tamaasa piumaffigineqaqqaaratik makku pillugit paasissutissanik

akilaraaruseriffimmut tunniussisassapput:

- 1) Attartortitsisup inuttut normua imaluunniit CVR-normua.
- 2) Ukiup siuliani attartortitsisumut akissarsiatut tunniunneqartut annertussusaat.

Imm. 3. Imm. 1 aamma 2-mi paasissutissanik taaneqartunik tunniussisussaataaneq pillugu najoqqutassanik erseqqinnerusunik akilaraaruseriffik aalajangersaasinnaavoq, tassunga ilan-ngullugu paasissutissiisussaataanermit piumasaqaatinik annikinnerulersitsisinnaalluni.

Nutserisut akissarsiaat

§ 6. Translatørinut, oqalutsinut, nutserisunut assigisaannullu akissarsiat akilaraarutit A-nut unerartitsinertaqanngitsunik akiliisoq ukiut tamaasa piumaffigineqaqqaarnani makku pillugit paasissutissanik akilaraaruseriffimmut tunniussisaaq:

- 1) Tigusisup inuttut normua imaluunniit CVR-normua.
- 2) Ukiup siuliani tigusisumut akissarsiat tunniunneqartut annertussusaat.

Imm. 2. Paasissutissanik tunniussisussaataaneq pillugu najoqqutassanik erseqqinnerusunik akilaraaruseriffik aalajangersaasinnaavoq, tassunga ilanngullugu paasissutissiisussaataanermit piumasaqaatinik annikinnerulersitsisinnaalluni.

Ilaasortaanermit akiliutit

§ 7. Suliatigut peqatigiiffit soorlu akilaraaruserinermik ingerlatsineq pillugu Inatsisartut inatsisaanni § 33 c, imm. 1-imi taaneqartut ukiup siuliani ilaasortaniit akiliutit tiguneqartut pillugit ukiut tamaasa piumaffigineqaqqaarnatik paasissutissanik akilaraaruseriffimmut tunniussisassapput, tassunga ilanngullugu ilaasortap akiliutaanut attuumassuteqartumut kinaassutsimut inuup normuanik ilalerlugit paasissutissat. Akiliutit nalunaarutigineqartut annertussusaat pillugit paasissutissiisusaaq ilaasortanut nalunaaruteqassaaq.

Imm. 2. Paasissutissanik nalunaaruteqarnermi ilaatinneqartussap nalunaaruteqartussaataa-sumut kinaassutsini pillugu ilisimatitsisaaq, tassunga ilanngullugu inuttut normuni.

Imm. 3. Nalunaaruteqarnisaaq pillugu najoqqutassanik erseqqinnerusunik akilaraaruseriffik aalajangersaasinnaavoq, tassunga ilanngullugu paasissutissiisussaataanermit piumasaqaa-tinik annikinnerulersitsisinnaalluni.

Akiliunneqarluni angalanerit

§ 8. Inuit imaluunniit inatsisitigut inuttut pisinnaatitaasut, tassunga ilanngullugit sulinngiffeqarnermi aningaasaateqarfiit, atorfinitsitsinermut pissutsit avataasigut inunnet imaluunniit pisortani atorfeqartunut akiliussillutik angalanernut tapiissuteqartut, ukiut tamaasa piumaffigineqaqqaarnatik akilaraaruseriffimmut makku pillugit paasissutissanik tunniussisapput:

- 1) Tapiissutisinnatitaasut allallu tapiissutisut inuttut normui.
- 2) Ukiup siuliani tapiissutisinnatitaasup angalaneri tamakkiisut amerlassusaat.
- 3) Ukiup siuliani tapiissutisinnatitaasumut tapiissutigineqartut annertussusaat.

Piffissaq

§ 9. §§-it 2-miit 8-mut paasissutissat taaneqartut ukiumi paasissutissanut attuumassuteqartut ukiup tulliani kingusinnerpaamik 31. januarimi akileraaruseriffimmut nalunaarutigineqassapput.

Kontonik ingerlatsisuusut nalunaarutaat

§ 10. Aningaaseriviit, sparekassit, piginneqatigiiffiit karsii, aningaasanik nioqqutillit, aningaasanik nalilinnik nioqqutillit, eqqartuussissuserisut allallu, aningaasanik erniortitassanik tiguisartut, ukiut tamaasa namminneerlutik ukiup siuliani erniat tunniunneqartut imaluunniit pisassanngortinneqartut allatulluunniit kontoqartunut ataasiakkaanut iluanaarutiginit annertussusaat pillugit, ernialiinerup ulluanik il.il. aammalu aningaasat uningasuutit ukiup siuliata naanerani amerlassusiinik paasissutissanik akileraaruseriffimmut tunniussisassapput. Akileraaruseriffiup aalajangersinnaavaa allanit, ingerlatsinerminnut atatillugu inuit allat aningaasaataannik erniaqartitsisunit, paasissutissanik taamaattunik tunniussineqassasoq.

Imm. 2. Imm. 1 malillugu nalunaarutigineqartut kontop taaguutaanik paasissutissanik imaqassaaq, tassunga ilanngullugit kontop qanoq ittuuneranik, kontoqartup aqqanik, najugaanik aammalu inuttut normuanik, suliffeqarfittut ingerlatsiviup normuanik (CVR-nr.) imaluunniit inuusutissarsiummik ingerlatsiviup normuanik (SE-nr.). Akileraaruseriffiup kontonik pigisaqartunut, inuttut normoqaratillu ingerlatsivittut normoqanngitsut pillugit nalunaaruteqarnermi erseqqinnerusumik najoqqutassat aalajangersinnaavai.

Imm. 3. Imm. 1 malillugu paasissutissiisussaataitaanermi aamma pineqarput kontot il.il. ukiup ingerlanerani atorunnaarsimasut. Kontonut taamaattunut tunngatillugu atorunnaarsitsinermi uningasuutit amerlassusii nalunaarutigineqassapput.

Imm. 4. Pisariillisaataatillugu paasissutissallu pineqartut akileraarutinik nakkutilliinermut pingaaruteqarpiangikkaangata, akileraaruseriffiup imm. 1 aamma 2 naapertorlugit inunntut ataasiakkaanut imaluunniit paasissutissiisussaataitasut eqimattanut imaluunniit kontonut assigiinngitsunut ataasiakkaanut tunngatillugu atuukkunnaartissinnaavaa annikinnerulersillugilluunniit, taamatullu aamma akileraaruseriffiup aningaasat nalunaarutigineqartussat ikinnerpaaffissaat pillugu aalajangersaasinnaalluni.

Imm. 5. Paasissutissiisussaataitasup kontomik pigisaqartumut aningaasat nalunaarutigineqartut amerlassusaannik nalunaaruteqarnermik ilisimatissavaa. Kontomik pigisaqartumut ilisimatitsissuteqarneq pissaaq kingusinnerpaamik ukiup paasissutissiisutitut attuumassuteqartup tulliani februaarip aallaqqaataani.

§ 11. Kinaluunniit ingerlatsinerminut atatillugu erniaqartitsilluni aningaasanik taarsigassarsisitsisartoq taarsigassanilluunniit isumagisaqartartoq, akileraarusigaanissamut atugassanik ukiut tamaasa namminneerlutik tamanna pillugu akileraaruseriffimmut nalunaaruteqartassaaq.

Imm. 2. Imm. 1 malillugu nalunaaruteqarneq taarsigassarsitinneqartup kinaaneranut paasissutissanik, paasissutissanillu kontomut taarsigassarsinermullu pissutsit attuumassuteqartup pillugit paasissutissiisutinik imaqassaaq. Aningaasanut taarsigassarsianut ataasiakkaanut tunngatillugu nalunaarutigineqassapput:

- 1) taarsigassarsinerup qanoq ittuunera,
- 2) ernialiutat imaluunniit erniat akiligassanngorsimasut,
- 3) taarsigassarsinermut atatillugu ernianik nalunaaqutsiineq, qaammatsiutit malillugit ukiup nalunaaruteqaataasup siuliani ernaliussanik akiligassanngoreersunik akiliuteqarsimannginnermi, tamatumunnga nalunaaruteqartussaattilluni,
- 4) taarsigassarsinermut atatillugu ernianik nalunaaqutsiineq, qaammatsiutit malillugit ukiumi nalunaaruteqaataasumi taarsigassarsianik akiligassaajunnaarsitsisoqarsimatillugu tamatumun-nga nalunaaruteqartussaattilluni, imaluunniit ukiuni siuliinut tunngatillugu,
- 5) sullissinermut akissarsiat ingerlaavartut il.il.,
- 6) sillimmatissanut aningaasaateqarfimmut allaffissornermullu akiliutit,
- 7) realkreditinstituttit sillimmatissanut aningaasaateqarfinit akileraarutaasussanik agguagarsiat amerlassusii, agguagarsiat tiguisumit ukiumi tunniussiffusumi isertitatut naatsorsuutigineqartussaattillugit,
- 8) ulloq ernialiiffusoq,
- 9) 31. decembarimi akiitsut, aamma
- 10) akiitsut 31. decembarimi nalingat, taarsigassarsiat aningaasanut nioqquteqarfimmi nalunaarsukkanik obligationinik tunngaveqartumik taarsigassarsiaappata.

Imm. 3. Pisariillisaataatillugu paasissutissallu pineqartut akileraarutininik nakkutilliinermut pingaaruteqarpiangikkaangata, akileraaruseriffiup nalunaaruteqarnissamut paasissutissiisussaataitaaneq atuukkunnaartissinnaavaa annikinnerulersilluguluunniit.

Imm. 4. Atukkiussanut tunngatillugu akiliuteqarnerit § 12 naapertorlugu paasissutissiisussaataitaasumit ingerlanneqarpata, imm. 1 naapertorlugu nalunaaruteqarnissamut pisussaaffik atuutinngilaq.

§ 12. Aningaaseriviit, sparekassit, piginneqatigiiffiit karsii, ingerlatseqatigiiffiit aningaasaliissuteqartartut, aningaasanik nalilinnik nioqqutillit, aningaasanik nioqqutillit, eqqartuussissuserisut allallu, inuussutissarsiummik ingerlatsinerminnut atatillugu pigisanik aalaakkaasunik qularnaveqqusiussaarluni taarsigassarsinermi allagartanik nakkutigisassaminnik sillimmatinik paarisassanik tigusaqartarunik, akileraarusiinissamut atugassanik paasissutissanik imm. 2-mi taaneqartunik ukiut tamaasa namminneerlutik akileraaruseriffimmut nalunaaruteqassapput.

Imm. 2. Imm. 1 malillugu nalunaaruteqarneq taarsigassarsitinneqartup sillimmatinillu pigisaqartup kikkuunerinut paasissutissanik aammalu taarsigassarsinermut tunngasunik paasissutissanik imaqaasaaq. Taarsigassarsitinneqartunut sillimmatinillu pigisaqartunut ataasiakkaanut tunngatillugu nalunaarutigineqassapput:

- 1) ernialiutat imaluunniit erniat akiligassanngorsimasut,
- 2) taarsigassarsinermut atatillugu ernianik nalunaaqutsiineq, qaammatsiutit malillugit ukiumi nalunaaruteqaataasumi taarsigassarsianik akiligassaajunnaarsitsisoqarsimatillugu tamatumun-nga nalunaaruteqartussaattilluni, imaluunniit ukiuni siuliinut tunngatillugu,
- 3) 31. decembarimi akiitsut sinneri aamma
- 4) akiitsut 31. decembarimi sinnerannut naligititaq.

Imm. 3. Pisariillisaataatillugu paasissutissallu pineqartut akileraarutininik nakkutilliinermut pingaaruteqarpiangikkaangata, akileraaruseriffiup nalunaaruteqarnissamut paasissutissiisussaataitaaneq atuukkunnaartissinnaavaa annikinnerulersilluguluunniit.

Kontomik pigisaqartut Kalaallit Nunaanni najugaqartut, najugaqarallartut imaluunniit angerlarsimaffeqartut

§ 13. Kontomik, akileraaruserinermik ingerlatsineq pillugu Inatsisartut inatsisaanni § 36, imm. 1-imi oqaatigineqartut pilersitsisoq, paasissutissat tunniunneqartut eqqortuuneri uppersaateqarfigissavai, kontomik ingerlatsisuusumut passimik, inuup normuanut uppersaammik allamilluunniit pisortanit kinaassutsimut uppersaammik takutitsinikkut. Inuup normuanut, CVR-nr.-mut imaluunniit SE-nr.-mut tunngasunik, akileraaruserinermik ingerlatsineq pillugu Inatsisartut inatsisaanni § 37, imm. 1-imi oqaatigineqartut, paasissutissanik paasissutissiinermut atatillugu, kontomik pigisaqartup aqqanik najugaanillu paasissutissiissutinik tunniussineqassaaq.

Imm. 2. Kontomik pilersitsisoqarsinnaangilaq kontomik pilersitsiniartup imm. 1-imi taaneqartunik paasissutissanik nalunaaruteqareertinnagu.

Imm. 3. Paasissutissat imm. 1-imi taaneqartut kontomik pigisaqartup kinaanerani paasinninnissamut pisariaqartut allanngorpata, kontomik pigisaqartup kontomik ingerlatsisumut paasissutissiisussaataasumut qaammat ataaseq qaangiutsinnagu allannguuteqarneq pillugu nalunaarfigissavaa.

Imm. 4. Ingerlatseqatigiiffinnut, peqatigiiffinnut, aningaasaateqarfinnut allanullu kontomik pigisaqartuusunut inuup normuanik, CVR-nr.-mik imaluunniit SE-normumik pigisaqanngitsunut tunngatillugu, siulittaasup inuttut normua imaluunniit inuup allap kontomik pigisaqartoq sinnerlugu iliuuseqarsinnaasup inuup normuanik nalunaartoqassaaq.

Kontomik pigisaqartut Kalaallit Nunaata avataani najugaqartut, najugaqarallartut imaluunniit angerlarsimaffeqartut

§ 14. Kontonut akileraaruserinermik ingerlatsineq pillugu Inatsisartut inatsisaanni § 36, imm. 1-imi taaneqartunut inunniit, ingerlatseqatigiiffinnit peqatigiiffinnillu il.il., Kalaallit Nunaata avataani najugaqartunit najuisuusunilluunniit imaluunniit qaammatit pingasut sinnerlugit Kalaallit Nunaanniissimangitsunit pigineqartunut tunngatillugu, inuup normua, CVR-nr. imaluunniit SE-nr. oqaatigineqassaaq aatsaat kontomik pigisaqartoq normumik taamaattumik tunineqarsimatillugu. Tamatumalu saniatigut kontomik pigisaqartup aqqa, najugaa nunalu angerlarsimaffigissaa oqaatigineqassapput.

Pensiuunisianut tunngasunik nalunaaruteqarnerit

§ 15. Pensiuunisiaqalernissamut aningaasaateqarfiit, pensiuunisiatigut inuunermullu sillimmasiissutitigut aqqissuussinernut ingerlatseqatigiiffiit, aningaaseriviit allallu soraarnerussutisiat aqqissuussaannit akilersuutitigut tigusisartut, kingusinnerpaamik qaammatip 10-ani akileraaruseriffimmut qaammatip siuliani ilassutit akiliutigisat aamma nassuiaammik tunniussinermi akilersuutit nalunaarutigissavai. Nalunaarut qarasaasiakkut tunniunneqassaaq, tamannalu soraarnerussutisiaqartussaataasup imaluunniit kontomik piginnittup ataasiakkaap paasissutissaanik, akileraaruseriffiup malittarisassai naapertorlugit, immersorneqarluni. Nalunaarummik tunniussinissamut piffissaliusaaq kingulleq sapaataappat imaluunniit nalliuttuuppat imaluunniit arfininngorneruppat, piffissaliusaaq ulluinaq tullianut sivitsorneqassaaq.

Imm. 2. Akileraaruseriffik malittarisamik, ilusermik, paasissutissat aaqqissuussaanerannik aamma pissutsinik allanik akileraaruseriffiup qarasaasiakkut nalunaarutininik suliarinninnerannut pingaarutilinnik piumasaaqateqarnissamut aalajangersaasinnaavoq.

§ 16. Pensiunisiaqalernissamut aningaasaateqarfiit, pensiuunisiatigut inuunermullu sillimmasiissutitigut aaqqissuussinernut ingerlatseqatigiiffiit allallu pensiuunisianik ingerlaavartumik inuuneq naallugu sillimmasiissutinik tunniussisartut, ukiut tamaasa namminneerlutik akileraaruseriffimmit piunaffigineqaqqaaratik, Akileraaruserinermik ingerlatsineq pillugu Inatsisartut inatsisaanni § 39, imm. 1 aamma 2-mi taaneqartutuut, akileraaruseriffimmut paasissutissiisassapput aamma pensiuunisianut aaqqissuussinernut pigisaqartup kinaanerani paasinninnissamut pisariaqartut pillugit paasissutissiinerit ilanngullugit.

Imm. 2. Kinaluunniit pensiuunisiassanik aaqqissuussinermik, aningaasarsianit akileraarutit pillugit Inatsisartut inatsisaanni §§-it 39, 40 aamma 47 b naapertorlugit taasanik pilersitsisoq, soraarnerussutisiaqarnissarlunniit siunertaralugu ileqqaagaqartoq, paasissutissiisussaataasunut aaqqissuussinermut pigisaqartup (kontomik piginnittup) kinaanerani paasinninnissamut pisariaqartut pillugit paasissutissiisaaq, tamatumani inuup normua nalunaaruteqartussaanerit atuutsitsinissamut pisariaqartinneqartut, aammalu paasissutissat tunniunneqartut eqqortuuneri uppersaateqarfigineri ilanngullugit.

Imm. 3. Pensiunisiassanut aaqqissuussinermik pilersitsisoqarsinnaangilaq pilersitsiniartup imm. 2-mi taaneqartunik paasissutissanik nalunaaruteqareertinnagu. Imm. 2-mi taaneqartutut pissutsit allannguuteqarpata, paasissutissiisussaataasumut qaammat ataaseq qaangiutsinnagu allannguuteqarneq pillugu nalunaaruteqartoqassaaq.

Aningaasanik nakkutigisanik taarsigassarsianillu nalunaaruteqartarneq

§ 17. Suliffeqarfimminut atatillugu aktianik nakkutigisassanik nalilinnut sillimmasiineri tiggumiaqartoq, ukiut tamaasa akileraaruseriffimmut sillimmasiissutinik aningaasanik nioqquteqarfimmi nalunaarsukkanit aktianit assigisaannillu, iluanaarutisianik qaammatisiutit malillugit ukiup atuuttup siuliini pissarsiarititaasut pillugit nalunaaruteqartassaaq.

Imm. 2. Imm. 1 naapertorlugu nalunaarutit iluanaarutininik tigusaqartunut ataasiakkaanut tamanut paasissutissanik makkunannga imaqaassapput:

- 1) Nalunaaruteqartup kinaanerani paasissutissat.
- 2) Iluanaarutisianik tigusaqartup kinaanerani paasissutissat, tamakkua pigineqarnerat naapertorlugu.
- 3) Iluanaarutisiat ukiup ingerlanerani agguagarsiaritinnegartut (tamakkiisut) annertussusiat.
- 4) Iluanaarutisiat ukiup ingerlanerani agguagarsiaritinnegartut akileraarutitai akilernerqarsimasut, takuuk nr. 3.
- 5) Aktiat il.il. iluanaarutisiaqaataasut nunami sumi pilersinneqarsimanersut, aktiat il.il. ani-ngaasanik niuerfimmi nalunaarsugaappata.

Imm. 3. Nalilinnut toqqorsivimmiititsisoq imm. 1-imi taaneqartutut, nalunaaruteqarnissamut paasissutissiisuteqartussaasumut kinaanini ilisimatitsissutigissavaa, tamatumani inuup normua, CVR-nr. imaluunniit SE-normu, ilanngullugit.

Imm. 4. Imm. 2-mi taaneqartutut aktianit iluanaarutisianik pissarsisoq, nalunaaruteqarnissamut

paasissutissiisuteqartussaasumut kinaanini ilisimatitsissutigissavaa, tamatumani inuttut normuni, CVR-nr. imaluunniit SE-nr. ilanngullugit. Tamannali atuutinngilaq iluanaarutisianik pissarsisoq ingerlatseqatigiiffinnut tunngasumik inatsisini malittarisassat malillugit ingerlatseqatigiiffimmi peqatigiiffimmiluunniit il.il. agguagarsisitsisumi nalunaarsugaanissaq pisussaangippat.

Imm. 5. Pisariillisaataatillugu paasissutissallu pineqartut akileraarutininik nakkutilliinermut pingaaruteqarpiangikkaangata, akileraaruseriffiup inunnuat ataasiakkaanut imaluunniit qassikkaarlugit paasissutissiisussaataitaasunut nalunaaruteqarnissamut paasissutissiisussaataitaneq imm. 1-imiit 4-mut maleruagassat taaneqartut atuukkunnaartissinnaavai annikinnerulersillugilluunniit.

§ 18. Suliffeqarfimminut atatillugu aktianik nakkutigisassanik nalilinnut sillimmasiivimmi tigummiaraqtoq, ukiut tamaasa akileraaruseriffimmut qaammatsiutit malillugit ukiup siuliani paarititaasunit aningaasanik nioqquteqarfimmi nalunaarsukkanit aktianit assigisaannillu nalunaaruteqartassaaq, sillimmasiivimmiititsineq inummut kiffartuussineruppat.

Imm. 2. Imm. 1 malillugu nalunaarutit aktianut ataasiakkaanut aktiat suunerinik ukiullu naa-nerani nalingannik tunngasunik paasissutissanik imaqaassapput.

Imm. 3. Suliffeqarfimminut atatillugu aktianik nioqquteqartoq, ukiut tamaasa akileraaruseriffimmut aningaasanik nioqquteqarfimmi nalunaarsugaasunik aktianik il.il. qaammatsiutit malillugit ukiup atuuttuusup siuliani tunisaqarnernik nalunaaruteqartassaaq tunisaqarnerit inummut kiffartuussineruppata. Nalunaaruteqarneq aktiap suuneranik, qanga tunineqarfianik aammalu aktiap tunineqarnerani naligitinneqartoq pillugu paasissutissanik imaqaassaaq.

Imm. 4. Nalilinnik sillimmasiivimmiititsisoq tuniniaassunneqartorluunniit, nalunaaruteqarnissamut paasissutissiisussaataitaasumut kinaanerminik, tamatumani aamma inuttut normuminik ilisimatitsissuteqassaaq.

Imm. 5. Pisariillisaataatillugu paasissutissallu pineqartut akileraarutininik nakkutilliinermut pingaaruteqarpiangikkaangata, akileraaruseriffiup inunnuat ataasiakkaanut imaluunniit qassikkaarlugit paasissutissiisussaataitaasunut nalunaaruteqarnissamut paasissutissiisussaataitaneq imm. 1-imit 4-mut maleruagassat taaneqartut atuukkunnaartissinnaavai annikinnerulersillugilluunniit.

§ 19. Pisortat karsii, realkreditinstitutit, pappiaqqanut nalilinnut qitiusumik nalunaarsuiffit, aktieselskabit, aningaaseriviit, sparekassit, piginneqatigiiffit karsii, aningaasaliisuteqarnernut peqatigiiffit, aningaasanik nalilinnik nioqquteqartut allallu, ernianut allagartanik aningaasannortitsisartut, obligationinulluunniit tunngasunik ernialiisartut, akileraaruseriffimmut atugassanik minnerpaamik ukiumut ataasiarlutik namminneerlutik akileraaruseriffimmut ukiup siuliani obligationinik pigisaqartut ataasiakkaat ernianut allagartanik aningaasannortitaasa ernialiussalluunniit aningaasartaasa amerlassusiinik obligationillu pineqartut taaguutaannik ukiullu pineqartup naanerani nalimikkut nalinginik aammalu paasissutissanik imm. 3-mi 4-milu taaneqartunik tunniussisassapput.

Imm. 2. Imm. 1-imi taaneqartut taamatuttaaq aningaasaliinernut peqatigiiffinni aningaasaliinernut uppersaatinut tunngatillugu iluanaarutininut allagartanik aningaasannortitsinerit imaluunniit aningaasaliinernut peqatigiiffinni kontonik ingerlatsiviusuni aningaasaliisutininik pigisassannortitsinerinik aammalu aningaasaliisutininut uppersaatinut kontonik ingerlatsiviusumi aningaasaliinernut peqatigiiffiup taaguutaa, tamatumani suuneri sumullu atortuuneri, ukiullu naanerani nalimikkut nalingi pillugit paasisitsissutigineqassapput. Akileraaruseriffiup aamma aalajangersinnaavaa,

nalunaaruteqarnissamut paasissutissiisussaataaasut paasissutissanik akileraaruseriffimmut nalunaaruteqarnissamut pisussaaffimminnik naammassinninnissamut atugassanik imminnut ilisimatitseqatigiittassasut. Taamatutaaq obligationinik, allatamik erniaqartinnagit imaluunniit aningaasarsianit akileraarutit pillugit Inatsisartut inatsisaat naapertorlugu, erniasiarititassanut minnerpaaffissarititaasoq ataallugu erniaqartillugit pilersitaasunik tamakkiisumik akiligaqarnerit pillugit paasissutissat tunniunneqassapput.

Imm. 3. Aningaasaliinernut peqatigiiffimmi kontonik ingerlatsisuusumi ilaasortaasoq peqatigiiffiup imm. 1 aamma 2 naapertorlugu ilaasortaasup aningaasaliissutaanut ikisanik nalunaaruteqarnissami atugassanik imaluunniit peqatigiiffiup § 20 naapertorlugu tigusat pillugit peqatigiiffiup nalunaaruteqarnissaani atugassanik, qinnuteqartoqartillugu peqatigiiffiup akileraartarnermut tunngatillugu attuumassuteqartunik tunngavigisat ilaasortaasup isertitanik naatsorsuinermit atugarisai pillugit, tamatumani aamma pineqartup inuuniutigalugu pissarsianit akileraarusigaanersoq nalunaaruteqassaaq.

Imm. 4. Ernianut iluanaarutisianulluunniit kuponinik aningaasanngartitsinissamik imaluunniit pappiaqqanik aningaasanik nalilinnik qitiusumik nalunaarsuiffimmi kontomik pilersitsinissamik qinnuteqartoq, akileraaruseriffiup ilusissamik aalajangigaa malillugu iluseqartumik aningaasanngartitsiviusoq imaluunniit kontomik ingerlatsiviusumik institutti piginnittuusup kinaaneramik ilisimatitsissuteqassaaq paasissutissallu tunniunneqartut eqqortuuneri uppersarlugit. Kuponi aningaasanngartinneqassanngilaq erniallu akilerneqassanatik aningaasanngartitsiffiusoq imaluunniit kontomik ingerlatsiviusumik institutti paasissutissanik taaneqartunik pereertinnagu.

§ 20. Kinaluunniit nuussinermik ingerlatsitseqqilluni akunnermiliuttuusooq imaluunniit pissarsisoq imaluunniit nuussisoq pillugit akunnermiliuttutut taasaq imm. 3 naapertorlugu akileraaruseriffimmut obligationinik erniasianullu allagartanik, tamatumani aamma obligationinik allassimasumik erniaqartitaanngitsunik imaluunniit erniarititat minnerpaaffissaat ataallugu allaassimasumik erniaqartillugit pilersitaasunik, aningaasarsianit akileraarutit pillugit Inatsisartut inatsisaat naapertorlugu, tunniussinernik ilisimatinneqassaaq. Tamanna aamma atuuppoq aningaasaliissutinut uppersaatinik taamaattunullu tunngatillugu iluanaarutitut kuponinik tunniussinernut aammalu aningaasanngartitsinernut, tamatumani aamma aningaasanngartitsinernut ataasiakkaanut tunngatillugu piffissaq aningaasanngartitsiffiusoq pillugu, aningaasaliisarnernut peqatigiiffimmi kontomik ingerlatsisuusumi uninngasuutinut, aammalu tigusinerni ataasiakkaani aningaasaliisarnernut peqatigiiffiup aningaasanik nalilinnik pappiaraataasigut iluanaarutitut annaasaqaatinulluunniit piviusunngortitsinerup nalaani sulii piviusunngortitaanngitsortaanut. Akileraaruseriffiup attuumassuteqartut peqataasut § 10, imm. 2-mi taaneqartutut inuup normuanik il.il. paasissutissiisussaataaeremut pisussaaffilerneqarsinnaapput.

Imm. 2. Taamatutaaq imm. 1-imi aalajangersagaq piffissaq akiliiffissamut, pisinermut tunisinermullu tunngasunik isumaqatigiissutinut nuussinernulluunniit atuuppoq, isumaqatigiissuteqartuni illuatungiusut arlaat inuinnaapput.

Imm. 3. Suliffeqarfimminut atatillugu imm. 1 aamma 2-mi taasani pappiaqqanik nalilinnik imaluunniit isumaqatigiissutinik niueruteqarlunilu nuussinermik ingerlatitseqqilluni akunnermiliuttuusooq, imm. 1 naapertorlugu naalunaaruteqarluni paasissutissiisussaataavoq. Taamatutaaq aamma atuuppoq kimulluunniit inuussutissarsiutigalugu isumaqatigiissutinik taamaattunik suliaqarluni isumaqatigiissusiortartumut imaluunniit nuussinermik ingerlatitseqqilluni akunnermiliuttuusumut.

Kontomik ingerlatsiviusumi aningaasaliinernut peqatigiiffinni kontomit tigusinerit pillugit tamatumani peqatigiiffik nalunaaruteqartussaataavoq. Pappiaqqat nalillit imaluunniit illuatungeriit isumaqatigiissutaat imm. 1 aamma 2-mi taasat nuunneqartillugit, taakkualu oqaaseqatigiinni siullerni taasatut nalunaaruteqarnikkut paasissutissiisussaataaangippata, imaluunniit nalunaaruteqarnikkut paasissutissiisussaataasuunngitsumit tamanna pillugu isumaqatigiittoqartillugu aamma nuussinermik ingerlatitseqqilluni akunnermiliunikkut isumaqatigiissutinik suliaqartoqartillugu, pappiaqqanik nalilinnik imaluunniit isumaqatigiissummik illuatungiusumit pissarsisuusumit nalunaaruteqarnikkut paasissutissiisussaataaneq tassannga pissaaq.

Imm. 4. Pappiaqqanik nalilinnik imaluunniit isumaqatigiissutinik imm. 1 naapertorlugu nuussisoqartillugu imaluunniit isumaqatigiissummik imm. 2 naapertorlugu inuinnarmit imaluunniit inatsisit naapertorlugit inuttut tunngatinneqarsinnaasup akornanni isumaqatigiissusiortoqarsimatillugu Kalaallillu Nunaanni angerlarsimaffeqartuutillugit imaluunniit Kalaallit Nunaanni aalajangersimasumik ingerlatsiveqartumik inuussutissarsiuteqartut (akileraartartut) aamma inuinnarmit imaluunniit inatsisit naapertorlugit inuttut tunngatinneqarsinnaasup nunanit allanit pisup, imm. 3-mi oqaaseqatigiit siulliit naapertorlugit nalunaaruteqarnikkut paasissutissiisussaataaangitsuuppat aamma nuussineq akunnermiliuttumit imaluunniit isumaqatigiissut taamatut paasissutissiisussaataaangitsumit suliarineqarpat, akileraartup nalunaaruteqarnikkut paasissutissiisussaataaneq akisussaaffigivaa.

Imm. 5. Pissarsisoq, nuussisoq ingerlatitseqqillunuunniit akunnermiliuttuosq, nalunaaruteqarnikkut paasissutissiisussaataanermik pisussaaffeqarnerminik naammassinninngitsoq, obligationinut il.il. imaluunniit kuponimut attuumassuteqartunik ernianik iluanaarutinillu akileraartussatut isigineqarsinnaavoq.

Imm. 6. Pissutsit atuuttut tamanna taperserpassuk, paasissutissarlu akileraartarnermi nakkutilliinermut annikinnerusumik pingaaruteqarpat, akileraaruseriffup obligationinik il.il. piginnittunut ataasiakkaanut qassikkuutaanulluunniit nalunaaruteqarnikkut paasissutissiisussaataanermik pisussaaffeqarneq atorunnaarsissinnaavaa annikinnerulersilluguluunniit.

§ 21. Paasissutissanik §§-ini 10-miit 12-imut aamma 15-imiit 19-imut taaneqartunik paasissutissiisussaataapput inuit aammalu inatsisit naapertorlugit inuttut akisussaasut tamakiisumik killilimmillu akileraartussaataasut.

Pineqaatissiinerit

§ 22. Piaaraluni imaluunniit mianersuaalliorluni § 1, imm. 2, 3 aamma 4, § 3, § 5, imm. 1 aamma 2, § 6, imm. 1, § 7, imm. 1 aamma 2, § 8, § 9, § 10 imm. 1 aamma 5, § 11, imm. 1, § 12, imm. 1, § 13, imm. 1, 3 aamma 4, § 15, imm. 1, § 16, imm. 1 aamma 2, § 17, imm. 1, 3 aamma 4, § 18, imm. 1, 3 aamma 4, § 19, imm. 1-4 aamma § 20, imm. 1-imiit 4-mut aalajangersakkanik unioqqutitsisoq akilisitaanermik pineqaatissinneqarsinnaavoq.

Imm. 2. Nalunaartussaataasut, § 1, imm. 3 naapertorlugu digitalikkut nalunaaruteqanngitsut, pineqaatissiisutitut akiligassinneqarsinnaapput.

Imm. 3. Imm. 1 aamma 2-mi taaneqartut arlaat aktiaateqarluni ingerlatseqatigiiffup, piginneqataassuteqarluni ingerlatseqatigiiffup, piginneqatigiilluni ingerlatseqatigiiffup, peqatigiiffup, suliffeqarfup imminut ingerlatittup, aningaasaateqarfup taakkuluunniit assigisaasa unioqqutippagit, inatsisitugut pisinnatitaasutut akiliisitaanermik pineqaatissinneqarsinnaavoq. Namminersorlutik

Oqartussat, kommune kommunilluunniit suleqatigiiffiat unioqqutitsisuuppat Namminersorlutik
Oqartussat, kommunalbestyrelse imaluunniit kommunit suleqatigiiffiat akiliisitaanermik
pineqaatissinneqarsinnaavoq.

Imm. 4. Akiliutissanngortitat Nunatta Karsiata pisassarai.

Atuutilerfia

§ 23. Nalunaarut ulloq nalunaarutigineqarnerata aqaguani atuutilissaaq.

*Imm. 2. Aningaasarsianit akileraarutit pillugit paasissutissanik nalunaaruteqartarneq pillugu
Namminersorlutik Oqartussat nalunaarutaat nr. 8, 18. juni 2010-meersoq aamma atorunnaassaaq.*

Namminersorlutik Oqartussat, ulloq 3. februaari 2025

Erik Jensen (atsior.)

Aningaasaqarnermut Akileraartarnermullu Naalakkersuisoq

/ Nikolai S. Christensen (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut